

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Chief Minister Pu Lalduhoman Sairang Horticulture Centre-ah mau sawngbawl-na- Bamboo Treatment & Seasoning Plant, Bamboo Depot & Godown leh Meihawl siamna-Activated Charcoal Unit te vawiin khan a hawng.
- 2. BJP Mizoram chuan "OPERATION SINDOOR" ral hmatawnga awm India Sipai, Mizo tlangval huaisen te zahna leh an thlawpna lantir nan vawiin khan Aizawlah kawngzawh an huaihawt.
- 3. India chuan Arunchal Pradesh chhunga hmun thenkhat hming China-in thlak a tum chu awmze nei lo leh behchhan nei lo tiin a hnawl.
- 4. Mizo rawlthar Samuel Zadeng chuan Bihar-a Khelo India Youth Games (KIYG) neih mekah boys’ 70kg category boxing-ah Gold Medal a la.



BAMBOO PROCESSING UNIT

Cheng nuai 250 senga din, mau sawngbawl-na- Bamboo Treatment & Seasoning Plant, Bamboo Depot & Godown leh Meihawl siamna-Activated Charcoal Unit te vawiin khan Sairang Horticulture Centre-ah Chief Minister Pu Lalduhoman a hawng.

Chief Minister chuan thu sawiin, Mau chu state resource a neih that a ni a, a chhawr pawh an chhawr tangkai tih sawiin, tunlai mila hman thiam zel chuan ram sum leh pai dinhmun tithatu, eizawnna tam tak siamsaktu a ni thei a ti a. Mizoramah mau an tiduhdah thin hle nia sawiin, kum 2008 khan Mizoram sorkar chuan Baffacos hnuaiah sum tam tak sengin bamboo processing unit 15 a lo din tawh a, vawiinah chuan pakhatmah hmuh tur a awm tawh lo a ti a, sawrkar enkawl factory leh plant te chu an dam chhuah that loh thin em avangin vawiina unit an hawn chu tangkai taka hna a thawh theih nan tha tak enkawl turin a enkawltu tur Horticulture Department-a thawkte a chah a, Horticulture Department kaltlanga Mizoram leilungah sum tam tak sen ral a ni tawh chung a tak hmuh tur awm lo chu rilru nat thlak a tih thu a sawi baw a ni.

Horticulture Minister Pu C. Lalsawivunga pawhin thusawiin, mau sawngbawl-na kawngah Mizoram chuan hmasawnna thar a nei a, an lawmin an phur hle tih sawiin, Mizoramah mau a tam a, tualto ni lo, a chi dang pawh tunhma atangin an chin belh baw.

Horticulture Department Director, State Bamboo Missions-a Mission Director ni bawk, Pu C. H Lalmuanpuia chuan Mau treatment & Seasoning Plant chu nget thei tawh lo tura mau sawngbawlna a ni a, sawngbawl tawh chu kum 50 thleng a hman theih dawn tih sawiin, Activated Charcoal Unit atang hian ni khatah meihawl ton 3 a siam theih a ti a. Mau chingtu tur hi Zau pathum; Chhingchhip, Baktawng leh Saiphal khuaah te din an ni tawh bawk a. Heng mau sawngbawlna din kawngah hian North East Cane & Bamboo Development Council (NECBDC) ten technical support an pe a, a enkawl dan training pawh anni hian an pe vek dawn a ni.

<><><>

MZP

Agriculture Minister Pu PC Vanlalruata'n ram leh hnam tlu chhe mai tur siamtha turin Politician leh sorkar a tawh tawh lova, ram kal zel dan tur chu Mizo zirlai leh thalai rualte kutah a innghat a ni a ti.

Vawiina Mizo Zirlai Pawl (MZP) Gen Hq-in Vaivakawn Cultural Centre-ah Higher Secondary School Leaving Certificate (HSSLC) Examination 2025, Arts, Science leh Commerce stream Top 3-a Mizo tlingte chawimawina hun a buatsaih a hmanpuinaah Agriculture Minister Pu PC Vanlalruata chuan he thu hi a sawi a, Minister chuan Zirlai ti tha an chawimawite chu an insum theihna avanga hetiang dinhmun thleng thei an ni tih sawiin, hlawhtlinna chang tur chuan zirlaite chuan ruihhlo a ni emaw, social media a ni emaw, eng kawngah pawh insum theihna an mamawh a, mahni inthunun zo lo te chu ruihhlo ngai tluk an ni a ti.

Mizoramah ruihhlo in nasa taka bu a khuar tawh avangin zirlai kalkhawmte chu ruihhlo laka fihlim tum tlat turin a chah a, ram leh hnam kal zel dan tur ngaihtuah chianin lungawi thlak loh a tih thu sawiin, ram tluchhe mai tur siamtha turin Politician leh sorkar a tawh tawh lova, ram leh hnam damna leh din chhuah lehna bakah ram kal zel dan tur chu Mizo zirlai leh thalai rualte kutah a innghat a, bul tan tha a, mawhphurhna la turin a fuih a ni.

He hunah hian MZP President MZP President Pu H. Lalthianghlina pawhin thu sawiin, Mizoram atangin UPSC exam a inziak tling an awm lohna a rei tak em avangin Mizo zirlai te chu tan la zual deuh deuh turin a fuih a, sum thianghlim lo lakah fimkhur a, sum thianghlim lo a hausa te'n thalaite ruihhlo ngawl an vei tir chu khawtlang leh zirlai anga do zel a tul thu a sawi a, Khualzahawm LESDE Director Pu John Tanpuia pawhin zirlaite fuihna thu a sawi bawk a ni.

<><><>

BJP MIZORAM

BJP Mizoram chuan India leh Pakistan inbeihna"OPERATION SINDOOR" ral hmatawnga awm India Sipai, Mizo tlangval huaisen te zahna leh an thlawpna lantir nan vawiin khan Aizawlah kawng an zawh.

BJP Mizoram huaihawt kawngzawh hi Aizawl Treasury Square-a War Memorial atanga Vanapa Hall kawt thleng neih a ni a, kawngzawh tan hma in BJP Mizoram President Pu Vanlalhmuaka chuan thu sawiin, vawiina kawng an

zawhchhan chu Pakistan sorkarin a thlawp mifirfiakten India ram chhungah pawisawi lo mi engemaw zat Pahalgam-ah an thah avanga Prime Minister Narendra Modi-a kaihhruai India sorkarin a thungrulhna atana Operation Sindoor hnuaia Pakistan ah beihpui a thlaknaa tel India sipai huaisen te Mizoram mipui ten an thlawpna lantirna a ni tih a sawi a. India sipaite ral beihna hmunpuiah, tun hunah hian Mizo tlangval huaisen chhuanawm tak tak, Mizoram leh Mizo hnam tihming thatu, zam ngai lo val engmaw zat an awm tih an hriat thu sawiin, Mizoram leh Mizo hnamin an chhuang hle a, Mizoram a Kohhran zawng zawng ten an tawngtaipui tih sawiin Prime Minister Pu Naredra Modi kaihhruaina hnuaia Operation Sindoor a hnehna an chan avangin, Prime Minister chu an chhuangin, an thlawp tlat zel dawn tih a sawi bawk a ni.

Vanapa Hall kawta kawngzawh kharna inkhawm tawi neihah, BJP Mizoram Core Group Member, Pu. Lalrinliana Sailo chuan thusawiin, India chu Democracy ram a nih avangin tumah tihbuai leh beih a duh ngai lova, hetihlai hian mifirfiakten Pahalgam hmun nuam taka chawlh hmang te beiin, mi tam tak rawng taka an thah avang khan India chuan mifirfiakte chu na taka chhang letin, India chakna leh thiltih theihna lantir nan a hmang tih a sawi a. Vawiiinah hian India chuan khawvel mit hmuhah a ropuina a tarlang a, India ram inpumkhatna pawh nasa takin a lang a, Party dang pawhin Prime Minister Pu Modi-a an thlawp thu leh a lama an tan tlat thu pawh an sawi a ni a ti.

He hun ah hian Ex-Servicemen te leh party pawn lam atanga kawngzawh thlawptute an tel a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

ARUNACHAL PRADESH

India chuan Arunchal Pradesh chhunga hmun thenkhat hming China-in thlak a tum chu awmze nei lo leh behchhan nei lo tiin a hnawl. Union Ministry of External Affairs thupuangtu Randhir Jaiswal chuan hetiangna China chetlakna hi pawm theih anih loh thu sawiin India nihna leh dinhmun nen a inkalh tlat tih a sawi a. Hming thlak eng ang mahsela Arunachal Pradesh chu India ram chhung leh bung pawimawh tak a ni a, a ni chhunzawm reng dawn tih a sawi a ni.

<><><>

KHELO INDIA

Mizo rawlthar Samuel Zadeng chuan Bihar-a Khelo India Youth Games (KIYG) neih mekah boys’ 70kg category boxing-ah Gold Medal a la.

Kum 17 mi, Samuel Zadeng hian vawiin khan final-ah a khingpui Uttar Pradesh rawlthar, Peaveen Yadav chu 5-0 (Unanimous Decision)-in a hneh a, Gold Medal la in, Mizo boxer zingah Khelo India Youth Games-a Gold Medal la thei hmasa ber a ni.

Samuela hi National level boxer hlui, ZD Lalremsanga fapa a ni a, tun tum hi Khelo India Youth Games-a a tel hmasak ber tum niin, a tel vawikhatnaah Gold medal a la nghal a, Samuel-a chuan a tum ber chu Khelo India Scheme a luh theih a, boxer tha zawk ni thei tura platform neih a, India aiawha a sang thei ang bera chhuah a ni tih a sawi a, KYIG chu a bul tanna chauh a ni tih a sawi a ni.

Hemi hma hian Samuela hian state level-ah silver medal tum thum a lo la tawh a, nikum 2024 khan gold medal la in, a weight category-ah Mizoram champion lai a ni mek a, National level-ah bronze a lo la tawh bawk a ni.

KIYG 2025 hi tun thla May ni 4 atang khan neih tan a ni a naktuk, ah khar a ni dawn a, ram chhung hmun hrang hrang atanga infiammi thalai 5,000 vel telin, infiamna hrang hrang chi 27-ah te an inel a, Maharashtra chu pakhatna ni mekin, Gold-45, Silver-36, Bronze- 36, a vaiin medal 117 a la tawh a ni. KIYG 2025-ah hian Mizoram chu Football Mipa, Judo, Boxing, Weightlifting leh Sepak Takraw-ah te an tel a, vawiina Samuel Zadeng-in boxing-ah Gold Medal a la tih loh chu Mizoram aiawha infiammi tel zingah medal la an awm lo a ni.

